



14.10.2024

UKA2024/115

**Piffissaq sapaatip akunneranut nalinginnaasumik suliffiusartoq ullumikkut nalunaaquttap akunnerani 40-sunit 35-inut appartinneqarpata, tamatuma aningaasatigut, inuiaqatigiinnut peqqissutsikkullu kingunerisassaanik misissueqqullugit Naalackersuisut peqquneqarnissaannik Inatsisartut aalajangiiffigisassaattut siunnersuut. Misissuineq UPA 2025 nallertinnagu Inatsisartunut agguanneqassaaq.**

(Inatsisartunut ilaasortaq Anna Wangenheim, Demokraatit)

Siumuminngaaniit inatsisartuni ilaasortap Anna Wangenheim, Demokraatineersup siunnersuutaa pillugu imaattumik oqaaseqassaagut.

Siumumiit imaattumik anguniagaqarpugut;

Nunatta aningaasarsiornikkut isumannaatsuunissaa innarlernagu sulisarnerup sapaatip akunneranut 37 tiimit ingerlanneqartalersinnaanera Siumup sulissutigissavaa, taamaaliorneq soorlu ilaqutariit nukittuut, meeqqaminnut piffissaqarnerusut pilersinneqarnerisigut, naammassisaqarsinnaassutikkut angusaasartunik apparsaarinerussangippat aammalu aningaasatigullu nammaneqarsinnaanissaa qulakkeerneqarsimappat.

Siunnersuuteqartoq inatsisartuni ilaasortaq Anna Wangenheim, Demokraatineersup nunamiut allat inerisamalluartut periaasiannik misissuisimanerata kinguneranik misissuisimanera ajunngitsutut taarusupparput. Tassami nunamiut allat akissamikkut namminneq amikkisaarunnaarsimasut periusissaminnik pisinnaaffimminnik iliuuseqarnerat Siumuminngaaniit namminerminut ajunngitsutut nalilerusupparput.

Uanili uagutsinnut nunarput isigissagutsigu aningaasat bloktilskud-nik pissarsiarisartakkagut suli annertummata inuit sulisinnaasut tamakkiisumik atorfissaqartippagut. Soorunalimi nammineq nunatsinni naalagaaffinngorluta nunamiut allat periaasiannut ikaarsaarsinnaanerput Siumuminngaaniit ammaffigalugu oqaatigissuarput.

Uani aamma Siumuminngaaniit oqaatigissuarput sulisartukkormiut kattuffigisaasa tiiminik appaanissamik oqariartussappata tassuuna oqaloqataanissatsinnut piareersimagatta. Soorlumi aamma oqaatigiuartaripput peqqinnissaqarfitsinni nakorsassaaleqineq kiisalu aamma niviarsianik allanillu atorfinitsitsinissaaq ajornarsisartoq tamatta nalunngikkipput. Kiisalu aamma ataatsimiititaliarsuup oqariartornera niviarsiat (sygeplejeskit) nunatsinni ilinniarsimallutik naammassisimasut affai peqqinnissaqarfimmi allanik assiigiinngitsunik aallaaveqarlutik



sulinngitsut. Soorunalimi aamma tamakku eqqarsaatigalugit peqqinnissaqarfitsinni sulisussanik pilerisaarinissatsinnit tiiminik apparsaasoqarsinnaassappat oqalliseqataanissarput Siumumiit piareersimaffigaarput.

Sulisut allappassuit aamma eqqaasinnaagaluarpavut, soorlu meeqqerisut, atuartitsisut suliffissuarnilu sulisut. Unali siunnersuut pineqartumut misissuisitsinissamik siunnersuutaamat, Siumup tapersersormagu oqaatigissavarput. Taamaattoq Naalakkersuisut piffissalersuinermit allannguutaat aamma paasilluarsinnaagatsigu ilanngullugu tapersersorparput, imaappoq misissuineq 2025-mi ukiakkut naammassineqarsimassasoq.

Taamak oqaaseqarluta Inuussutissarsionermut Aatsitassanullu Ataatsimiititaliamut ingerlateqqinneqassasoq innersuussutigaarput.

Mala Høy Kúko  
Siumut